



KENYATAAN MEDIA

26 Februari 2016

UniMAP Bakal Miliki Surau Berteknologi Hijau Pertama

PADANG BESAR, 26 Feb (Bernama) -- Kampus Uniciti Alam Universiti Malaysia Perlis (UniMAP) bakal mempunyai surau berteknologi hijau pertama sebagai mercu tanda baharu hasil kerjasama pintar UniMAP dan Proven Holdings Sdn Bhd, syarikat pemaju Uniciti Alam.

Penasihat Menteri Pengajian Tinggi, Datuk Prof Emeritus Dr Kamarudin Hussin berkata projek surau yang menelan belanja RM1 juta itu akan menggunakan bumbung panel solar.

"Pembinaan surau itu menggunakan teknik Sistem Bangunan Berindustri (IBS) secara gotong royong oleh pelajar, dan kakitangan serta dijangka siap sepenuhnya sebelum bulan puasa tahun ini," katanya kepada pemberita selepas merasmikan majlis pecah tanah surau As-Saodah di kampus Uniciti Alam UniMAP di Sungai Chuchuh di sini, Jumaat.

Turut hadir Timbalan Naib Canselor Hal Ehwal Pelajar dan Alumni UniMAP Prof Madya Dr Mohd Fo'ad Sakdan dan Timbalan Mufti Perlis, Roslan Esa.

Kamarudin yang juga bekas Naib Canselor UniMAP berkata pembinaan surau itu juga bakal melengkapkan keseluruhan infrastruktur kampus berkenaan bagi kemudahan 3,840 pelajar dan 300 kakitangan Fakulti Teknologi Kejuruteraan UniMAP dan penduduk setempat di sini.

"Surau yang dibina di atas tanah berkeluasan 4,000 kaki persegi ini ditaja sepenuhnya oleh Pengerusi Eksekutif Proven Holdings Sdn Bhd merangkap Profesor Adjung UniMAP Datuk Dr Yusof Jusoh yang bakal menampung 500 jemaah dalam satu masa," katanya.

Sementara itu, Dr Yusof berkata pihaknya merancang membina 350 unit apartmen kepada pelajar dan kakitangan UniMAP yang bertugas di kampus Uniciti Alam itu berdekatan tapak kampus itu.

"Kita telah mengenal pasti tanah seluas 2.02 hektar bersebelahan dengan tapak kampus ini bagi membangunkan penempatan untuk pensyarah, kakitangan dan pelajar di kampus ini," katanya.

Dikeluarkan Oleh :

Aininulniza Mohd Yusof (aininulniza@unimap.edu.my)

Pegawai Perhubungan Media UniMAP